

**Date -05/10/2023**

**Time - 7:30 -7:40Hrs**

**REGIONAL NEWS BULLETIN**

**HEADLINES (MORNING)**

- 1. Mizoram puma tun thla ni 1-a kum tling chinte chhinchhiahna Electoral Roll tarchhhuahah Mizoramah vote nei mi nuai 8 sing 5 sang 1895 an awm.**
- 2. Central YMA chuan khua leh tui dik takte chu kumin inthlanpui neih turah vote thlak theuh turin a ngen.**
- 3. Saitual ah District Development Coordination & Monitoring Committee chu Chairman Pu C. Lalrosanga, Lok Sabha MP kaihhruaiin nimin khan an thukhawm.**
- 4. Information and Broadcasting Minister Anurag Singh Thakur'an Ujjwala Yojana beneficiaries te tan eirawngbawlina Gas LPG cylinder pakhat man Rs 100 zela thhniam leh anih thu a puang.**



**FINAL E ROLL**

Mizoram pumah tun thla ni 1-a kum tling chinte chhinchhiahna Special Summary Revision of Photo Electoral Rolls, 2023 neih a ni a, vawiin khan Final Roll tarchhhuah niin Mizoramah vote nei mi nuai 8 sing 5 sang 1895 an awm a ni.

Final Electoral Roll(ah hian mipa voter aia hmeichhe voter an tam zawk a, hmeichhe voter hi sing 2 sang 5956- in an tam zawk a, Hmeichhe voter zawng zawng nuaih 4, sing 3 sang 8925 an awm a, mipa vote nei nuaih 4 sing 1 sang 2969 an awm thung a, Kum 2018-a state assembly inthlanpui neiha electoral roll hman tawh nen khaikhin chuan vote nei zat hi sing 8 sang 3714-in an pung a ni.

He electoral roll hi member 40 awmna state Assembly inthlanpui neih tur atan hman a ni dawn tih Election Department hotute chuan an sawi a, tlangzarh hnua vote nei thar te erawh final publication hnua pawh ziah luh theih anni a ti bawk.

Assembly bial 12 awmna Aizawl District ah chuan Voter nuai 2 sing 8 sang 6807 awmin mipa nuaih 1 sing 3 sang 4249 leh hmeichhia nuaih 1 sing 5 sang 2558 an ni a, mipa aia hmeichhia an tamna chu 18,309 a ni.

Lunglei ah chuan voter nuai 1 za sawmthum paruk awmin mipa sing 4 sang 9644 an awm a, hmeichhia voter sing 50491 an awm a ni.

Siaha ah chuan voter sing 4 sang 4489 awmin Champhai ah chuan voter sing 5 sang 7180 an awm a, mipa sing 2 sang 7880 awmin hmeichhia sing 2 sang 9300 an awm bawk a ni.

Kolasib ah chuan voter sing 6 leh sang 3462 an awm a, hmeichhia sing 3 sang 2859 awmin mipa sing 30603 an awm a ni.

Serchhip ah chuan voter sing 5 sang 4152 an awm a, mipa sing 2 sang 6265 leh hmeichhia sing 2 sang 7887 an awm a, Lawngtlai ah chuan voter sing 9 sang 1439 awmin hmeichhia sing 4 sang 5754 an awm a, mipa sing 4 sang 5685 an awm thung a ni.

Mamit ah chuan voter sing 6 sang 4787 an awm a, hmeichhia sing 3 sang 2064 awmin mipa sing 3 sang 2723 an awm bawk.

Tun dinhmunah Mizoramah Service Voters Mipa 4884 leh Hmeichhia 89 awmin a vaiin 4973 an awm mek a, Mizoram pumah Polling Station 1276 a awm mek a ni.

Election Department hotute sawi danin special summary revision neih chhungin Bru mi leh sa Tripura state a in beng bel nget tawh mi 6239 te chu Mizoram electoral roll atangin paih anni a ti a, heti hian Bru mi leh sa paih zawng zawng chu mi sing 1 sang 1997 anni tih an sawi bawk.

<><><>

## CYMA

Central YMA chuan mipuite tan thuchhuah siamin ram rorelna chu mipui siam a ni a, a mawhphurtu anni tih hriaa khua leh tui dik takte chu vote thlak theuh turin an ngen tih an sawi.

Central YMA chuan India ram puma entawn tlak Inthlanna felfai leh muanawm tak an neih leh ngei theihna turin thawktute leh mipuite an ngen tih an sawi a, Mizo hnahthlak zingah sakhaw bil inthliar hrang zawnga chetna chu tha antih loh thu sawiin sakhaw bing puala Candidate siam lo turin Political party leh mipuite an ngen tih an sawi bawk.

Thuchhuah tarlan danin party tin ten manifesto an chhawpchuah te a taka tihlawhtlin theih ngei tur chauh tarlang se an duh anti a, mitinin an chhia leh tha hriatna thiang leh zalen tak hmanga vote an thlak theih nan Sum leh Therhlo dang hmanga vote lei leh hralh chu tih loh nise tih sawiin Social Media hrang hrangah thubelhchian dawlo leh finfiahna awm thehdarh loh ni se an ti bawk.

<><><>

## LIANCHHIARI RUN

Information & Public Relations Minister Pu Lalruatkima chuan NEC atanga sum hmuh hmanga sak Lianchhiari Run, Aizawla DIPR Directorate bul ami hlanna hun chu nimin khan a hmanpui.

Minister Pu Lalruatkima chuan thu sawiin, khawpui laili taka department thawktute leh mipuiin an chhawr tangkai tur multi facility centre – ‘Lianchhiari Run tha tak sak a ni chu ropui a ti a. Inhmukhawmna tur conference hall te, photo leh art exhibition neih na tur remchang tak te, theatre,

vantlang tan lirthei hun na tur parking area zau tak leh facility dang dang he building in a ken tel chu tangkai taka hman a nih a beisei thu a sawi. Minister chuan I&PR Department chu sorkar hmalakna puangzartu, sawrkar leh mipui inkar laichinna siam kawngah te, films, art leh adangte hmasawna atana hma lak kawngah leh, journalist-te leh sorkar inkar thawhhona atan mawhphurtu pawimawh tak a nih thu a sawi a. Minister a nih angin department hmalakna hrang hrang pawh tihlawhtling tura theihtawp a chhuah thu sawiin, kum nga chhungin kawng hrang hrangah hmasawna tam tak hmuh a nih thu a sawi a. Lianchhiari Run sak chungchangah hian rokhawhna hrang hrang awm chho mahse, hetia pultin a nit a hi lawmawm a tih thu a sawi a. NEC in project atana a ken tel bak a chhung cheibawlina tur mamawhte chu SEDP atanga sum hmuh a nih thu Minister hian sawiin lawmthu a sawi bawka a ni.

MLA Pu. F. Lalnunmawia, Mizoram Journalist Welfare Board member ni bawka pawhin he hun hi a hmanpui a ni.

Lianchhiari Run (A Multi Facility Centre) hi NEC sum nuai 900 leh State Sawrkar sum State Matching Share cheng nuai 100, a vaiin cheng nuai 1000 senga sak a ni a. A satu te hi Lushai Engineers an ni.

<><><>

## SAITUAL DISHA

Saitual ah District Development Coordination & Monitoring Committee chu an chairman Pu C. Lalrosanga, Lok Sabha MP kaihhruaiin nimin khan neih a ni a,

Saitual DC Conference room -ah thukhawmin Saitual District huamchhunga Central scheme hmanga hnathawh te thlirho in, Disha hnuaiia line department mamawh te leh hmasawn zel dan tur te an sawiho bawka.

Chairman Pu C.Lalrosanga chuan DISHA chu central sawrkar scheme pawimawh tak tak thlirhona a nih avangin Sawrkar Laipuiin a ngai pawimawh hle a ni, a ti a. Central Scheme te hi Mizoram in hmasawna atana an inghahna lian ber a ni a, churang chuan central scheme hmanga hnathawhte chu tha taka kalpuia, a tu a te pawh in theihtawp chhuah a ngai a ni, a ti. Pu C Lalrosanga chuan Mizoram chu Central scheme hrang hrang hmanga hnathawh kawngah India ah pawh a ti tha pawl a ni, a ti a. Saitual District chu district naupangte ni chungin hmasawna kawng hrang hrang hmuh a ni chu lawmawm a tih thu sawiin Line department te chu tang leh zual sauh turin a fuih bawka.

Meeting-ah hian Centrally Sponsored Scheme hrang hrang MGNREGA, PMAY, ICDS,NSAP, Swatch bharat mission, PMGSY, National Health Mission , Midday meal scheme , PMEGP,RKVY leh a dangte thlirho a ni a. Heng atang hian line Department ten an hmalakna leh an thlen chin report an pe a, an mamawh hrang hrang te MP hnenah hian an thlen bawka.

Saitual District chhunga Sawrkar Laipui ruahmanna hnuaiia hmalakna leh hnathawh hrang hrang thlirna-ah hian Line Department aiawh te chuan an hmalakna hrang hrang an sawifiah a, Education Department hmalakna hrang hrang zing ah learning enhancement Programme kaltlangin naupang pakhat

ah school board exam an in buatsaihna atan cheng 500 zel sem a ni a, naupang harsa zawkte tana a thlawna awm theihna hostel Avasiya Vidyalaya Girls Hostel Elementary leh Avasiya Vidyalaya -Girls hostel Secondary, mi 30 leng ve ve te din an ni.

MGNREGA, Ngopa RD Block hnuai ah 1st quarter April-june 2023 chhunga hna zawng zawng zawh fel a ni tawh a, 2nd quarter, August 2023 a hna awm te kal pui mek zel a ni. Saitual district chhung a block hrang hrang a PMAY hnuai ah beneficiaries 139 hnenah 2nd installment September 2023 khan pek chhuah a ni tawh bawk.

## KOLASIB DIST CONGRESS MEET

Kolasib District Congress Conference vawi khatna chu nimin khan Diakkawn YMA Hall-ah neih a ni a, MPCC President Pu Lalsawta chuan he hun hi a hmanpui.

Pu Lalsawta chuan thu sawiin, Mizoram sorkar hnathawk Inzawmkhawm pawl lian ber FMGE & W duh dan angin sorkar hnathawk te pension kalpui thin 'Old Pension Scheme' chu Congress sorkar hunah an kalpui dawn, a ti a. Congress sorkar chuan a thutiam te a tihlawhtling thin a, kuthnathawktute, sumdawng, dawrkai, Entrepreneur te leh zirlaiten an dinhmun siam nan sum an mamawh ang te chu 'Tang Puihna' hmangin kan pui dawn ani, a ti.

Party thenkhat chuan Sum hmachhuan in MLA inthlanah chak tum in an bei a, Congress chuan Sum hmachhuan tur an nei velo a, Sum pawh nei mah se party dangte tih ang an duh velo, tih sawiin tun ang tluka dinhmun chhian hian India leh Mizoram hi a awm ngai lova, BJP leh a thawhpuite thuneihna paih bo vat a ngai a, paih bo anih loh chuan hun reilote ah ram, hnam leh sakhua a him dawn lova, hmanni lawka an pass tak Forest Act (Dan) thar avang pawhin dinhmun hlauhawm takah an awm mek ahei vang hian BJP thawhpui ve miahlo tur Congress sorkar a ngai ani, a ti bawk.

He hun hi Pu Lalthanpuia Khawlhring, ADCC Gen Secy chuan kaihruai in, Pu Vanlalhruaia, ADCC Acting President leh MLA Candidate tur-Dr. Henry Zodinliana Pachuau (Tuirial); Pu S. Lalrinawma (Kolasib) leh Pu Lalhmachhuana (Serlui) te pawhin thu an sawi a ni.

<><><>

## UJJWALA YOJANA

Information and Broadcasting Minister Anurag Singh Thakur chuan nimin khan New Delhi-ah chanchinbumite a kawm a, Ujjwala Yojana beneficiaries te tan eirawngbawl na Gas LPG cylinder pakhat man Rs 100 zela thhniam leh anih thu a puang.

Pu Thakur-a chuan Union Cabinet in he thutlukna hi a siam a ni a, Pradhan Mantri Ujjwala Yojana hnuai ah mite tan Rs 200 a tihhniam tawh chu Rs 300 a tihhniam a ni leh ta a ni a ti.

<><><>